

## Kurudishwa Zizini na Mchungaji

*Kama vile mchungaji atafutavyo kondoo zake, siku ile anapokuwa kati ya kondoo zake waliotawanyika; ndiyo nitakavyonatafuta kondoo zangu; nami nitawaokoa katika mbali pote walipotawanyika, katika siku ya mawingu na giza.—Ezekieli 34:12.*

**K**ondoo aliyetanga mbali na zizi ni kiumbe mwenye anayehitaji msaada kuliko wote. Ni lazima atafutwe na mchungaji, kwa kuwa hawezi kujua mwenyewe njia ya kurudi zizini. Ndivyo ilivyo kwa mtu ambaye ametanga mbali na Mungu: hajiwezi sawa kabisa na kondoo aliyepotea, na ikiwa upendo wa Mungu haukuja kumwoko a singeweza kupata njia ya kurudi kwa Mungu.

Mchungaji yule anayegundua kuwa mmoja wa kondoo wake amepotea hawezi kuzembea kwa sababu ya kundi ambalo limehifadhiwa kwa usalama na kusema, “Ninao tisini na kenda, na itanigharimu sana kwenda kumtafuta mmoja aliyepotea. Ngoja tu atakuja, na kisha nitamfungulia mlango wa kondoo na kumruhusu aingie.” La; punde tu kondoo anapopotea mchungaji anajawa huzuni na wasiwasi. Anawahesabu na kuwahesabu kwa kurudiarudia. Anapokuwa na uhakika kwamba kondoo mmoja amepotea, hawezi kulala. Anawaacha wale tisini na kenda zizini, na kwenda kumtafuta yule aliyepotea. Kadiri usiku unavyozidi kuwa wa giza na wenye dhoroa na njia inavyozidi kuwa na hatari, ndivyo shauku ya mchungaji inavyozidi kuwa kubwa na ndivyo utafutaji wake unavyozidi kuwa wa bidii. Anafanya kila juhudi ya kumpata yule kondoo mmoja aliyepotea.

Ni faraja kiasi gani kwa mbali anaposikia kwa mara ya kwanza kilio chake hafifu. Akifuatilia sauti ile, anapanda miinuko mikali zaidi, anakwenda katika kingo za majabali, akiatarisha maisha yake yeye mwenyewe. Hivyo anatafuta, wakati kilio kile, kikizidi kufifia, kinamwambia kuwa yule kondoo yuko karibu kufa. Hatimaye juhudi zake zinazaa matunda; aliyepotea anapatikana. Ndipo hamkaripii kwa sababu amemsababishia shida nyingi kiasi kile. Hamfukuzi kwa fimbo. Wala hajaribu kumwongoza kuelekea nyumbani. Katika furaha yake anamchukua kiumbe yule anayetetemeka mabegani mwake; kama amechubuka na kujeruhiwa, anamkusanya katika mikono yake, akimsogeza karibu na kifua chake, ili kwamba joro la moyo wake yeye mwenyewe lipate kumpa uhai. Kwa shukurani kwamba kutafuta kwake hakukuwa bure, anambeba na kumrudisha zizini.

Mungu ashukuriwe, hajawakilisha katika fikira zetu picha ya mchungaji mwenye huzuni akirudi nyumbani pasipo kondoo. Mfano huu hauzungumzi kuhusu kushindwa bali kuhusu mafanikio na furaha ya urejeshwaji. Hapa kuna uthibitisho wa Mungu kwamba hakuna hata mmoja wa kondoo anayepotea wa zizi la Mungu anapuuza, hakuna hata mmoja anaachwa bila msaada. Kila mmoja ambaye atajitoa kwa ajili ya kukombolewa, Kristo atamwokoia kutoka katika shimo la uharibifu na kutoka katika miiba ya dhambi (Lulu za Uzima, uk. 125, 126).